

Dr. Joel Rajnherc

Cu radioterapia na ImSan mayoria di pashent cu cancer lo por wordo yuda aki mes

ORANJESTAD - Durante e congreso multi disciplinario di hematologia y oncologia, director di ImSan, dr. Joel Rajnherc a subraya cu e update cu científiconan y exper-tonan lider riba tereno di cancer a comparti ta confirma cu loke ta pasando na Aruba ta un spiel di loke ta pasando mundialmente. E cuida na Aruba no ta diferente di loke ta wordo haci na cualkier otro pais desaroya.

Na Aruba ya e specialistanan ta haci e parti di kimoterapia y cirugia di e tratamento di e pashent cu cancer na un nivel hopi halto. Loke falta ainda ta e di tres pilar cu ta radioterapia (bestraling), dr. Rajnherc a remarca.

Dr. Rajnherc a expresa su admiracion pa e logro di e organisadonan di e congreso pa loke ta e tremendo contenido di esaki presenta pa e exper-tonan lider den e ramo di cancer rond mundo. Aruba mester haci mas y miho ainda; falta "manpower", falta luga pa haci'e y loke sigur ta evidente ta cu falta ainda e centro di radioterapia, dr. Rajnherc a agrega.

E director di ImSan a elabora riba e status di e proyecto aki,



cu mester wordo ehecuta na Instituto Medico San Nicolas. Ya pa varios aña ta trahando caba riba e proyecto; casi tur stakeholder a duna nan aprobacion y sosten. Na februari 2015, a bay Parlamento y tur parlamentario ta di acuerdo cu mester ofrece radioterapia na Aruba y cu e mester bin na ImSan. Dr. Joel Rajnherc a aña di loke ta wardando ta e decision final cu tin cu wordo tuma. No por hala esaki atras mas y e mester bin pronto.

Radioterapia ta un tratamiento basta comun, segun e Director di ImSan, e ta e di tres pilar pa trata pashentnan cu cancer. Di tur e pashentnan cu ta sufri di e malesa di cancer mas o menos 60% lo tin cu wordo trata cu radioterapia den sentido curativo. Ac-

tualmente e porcentahe ey ta traduci pa Aruba den 150 pa 175 pashent pa aña.

Mayoria di e pashentnan cu cancer ta wordo manda Colombia, nan mester keda simannan largo na un pais cu no ta di nan, nan no ta na cas y nan ta sinti falta di nan yiunan, sernan keri y amistadnan esaki ta cosnan hopi dificil pa sigui acepta den un pais desaroya manera Aruba, dr. Rajnherc a bisa enfáticamente.

El a remarca cu tambe tin un otro grupo pa cual radioterapia ta masha importante, aunke actualmente nan no ta ricibiendo e tratamiento aki pasobra hopi di nan ta den un estado hopi debil pa por biaha.

Dr. Rajnherc a referi na e



mas of menos 50 pashentnan, cu ta 25% di e pashentnan cu ta bao di tratamiento, ken ya no por cura mas.

E pashentnan aki, na otro parti di mundo unda tin servicio di radioterapia ta ricibi e tratamiento pa alivia e sufrimiento cu nan ta pasando

aden. Si tin e tratamiento na Aruba, e pashentnan lo disfruta tambe di un calidad di bida miho, aunke nan no por wordo cura di cancer. E 50 hendenan aki no ta ricibiendo e tratamiento cu nan merece pasobra no tin e tratamiento na Aruba, loke dr. Rajnherc ta lamenta. □